

Alasan diberikan sebagai persediaan hadapi GST

GST belum bermula, peniaga naikkan harga

APABILA tiba sahaja tahun baharu, kita sebagai rakyat berhadapan dengan cabaran seperti kebimbangan menghadapi era cukai barangan dan perkhidmatan (GST) yang akan dilaksanakan 1 April nanti.

Pada minggu pertama sahaja kita mula sedar bahawa terlalu banyak barang naik daripada segi harga atau berkurangan kuantiti penawarannya.

Rata-rata kita lihat kedai-kedai kegemaran mula menaikkan harga atas nama persediaan menghadapi GST.

Kita sedar akan kenaikan harga tersebut kerana ini adalah kedai-kedai kegemaran yang selalu kita kunjungi untuk makan, minum, mencuci kenderaan, membeli barangan rumah dan lain-lain lagi.

Bagaimana pula dengan kedai-kedai bukan kegemaran kita?

Kita tidak tahu mungkin mereka juga menaikkan harga.

Melalui laman Facebook saya, ramai mengeluh apabila saya paparkan isu ini di laman peribadi saya.

Ramai mengakui bahawa kebanyakan kedai kegemaran mereka menaikkan harga antara 10 ke 30 peratus.

Sebagai contoh, kedai minum kopi kegemaran saya menaikkan harga kopi termurah mereka sebanyak 20 peratus RM2.50 ke RM3.

Kedai kegemaran saya untuk mencuci kereta telah menaikkan harga sebanyak 33 peratus dari RM6 ke RM8.

Sementara itu kedai kegemaran isteri membeli barangan RM5 akan menaikkan harga sebanyak 13 peratus ke RM5.65 dengan alasan

yang tidak logik untuk diterima akal supaya harganya dapat diselaraskan menjadi RM6 selepas ditambah dengan percukaian GST.

Bukankah sewajarnya kadar GST enam peratus dikenakan kepada harga asal RM5 dan menjadi RM5.30.

Kedai tersebut berkeras ingin menjadikan harganya genap RM6 kerana ingin mengekalkan konsep harga genap.

Secara peribadi saya merasakan bahawa kedai konsep RM5 ini amat biadab dan mengambil untung atas angin sebanyak 65 sen.

Isteri saya sering menyatakan kepada saya bahawa dengan gaji sebagai pensyarah institut pengajian tinggi awam (IPTA), keluarga kami sudah mula merasakan impak tidak langsung daripada demam pra GST ini.

Bagaimanakah dengan mereka yang berpendapatan rendah atau tidak berpendapatan tetap?

Apabila saya mencerminkan wajah kewangan keluarga saya, saya akan terbayang refleksi keluarga yang berpendapatan rendah.

Bagaimanakah wajah kewangan keluarga mereka selepas GST?

Apakah pendinding kita sebagai rakyat untuk melawan kebiadaban peniaga-peniaga seperti ini?

Apakah Akta 723 Akta Kawalan Harga dan Anti Pencatutan akan menjadi penyelamat kita?

Adakah golongan peniaga ini kebal daripada akta tersebut?

Setelah saya meneliti akta tersebut dan juga pengetahuan para peniaga mengenai akta itu bolehlah saya simpulkan bahawa mereka

tidak tahupun mengenai kewujudan akta tersebut.

Peniaga kecil juga adalah pengguna. Maka reaksi mereka pun sama.

Mereka takut dan panik menanti kedatangan GST dan atas alasan ketidaktentuan hala tuju perniagaan maka mereka menaikkan harga sebagai persediaan menghadapi GST.

Sekelumit di hati, mereka tidak tahu akan masa depan selepas GST kerana sebenarnya lebih terdedah kepada ketidaktentuan pasaran berbanding dengan syarikat-syarikat besar yang berdaftar di bawah program GST.

Oleh yang demikian, kerajaan melalui Kementerian Perdagangan dalam Negeri, Koperasi dan Kepenggunaan perlu mengambil dua langkah proaktif iaitu memberi pendedahan kepada peniaga mengenai akibat menaikkan harga barangan dan memperteguh penguatkuasaan dalam menghukum peniaga yang mengambil kesempatan.

Selain itu, Jabatan Kastam Diraja Malaysia juga perlu memainkan peranan penting dengan memberikan maklumat tepat kepada peniaga mengenai persediaan mereka menghadapi GST.

Apabila kedua-dua agensi ini memainkan peranan dengan lebih serius, maka ini akan dapat mengurangkan kes-kes peniaga dengan sembrono menaikkan harga.